



七十二峰足徵集第二十四卷

武峰吳定璋友篁蒐錄

高陽許汝璉宗玉編訂

許曄

曄字光遠包山人洪武初以學行徵

蒙召至京獻詩

布衣蒙召入京師足躡春風步玉墀父老喜除秦
法令儒生重見漢威儀九重鸞鳳翱翔日四海魚
龍變化時自古金陵多王氣聖君應建萬年基

許志問

志問字冲愚東山茭田人

自述

澤國蘋香遶洲渚溪水平添新漲雨青翠飛來湖
上山紅黃點綴林間樹會心獨坐采菱舟處處停
橈得自由事業從前真孟浪丈夫五十難低頭

許明輔

明輔字若冲志問之子

秦淮夜泛同葛嚴諸君子賦

秦淮煙景絕南北三五良宵月光白美人疑是廣
寒姝高明盡屬梁園客扁舟載月月欲移燈下看
花花笑時妖嬈艷艷芙蓉蕊綽約纖纖楊柳枝春
色撩人渾似醉幽意相看默相會抽毫誰寫遠山
橫含情轉覺秋波墜酒熱歡濃此夜良自歌金縷
觴勸郎從來不解為情死今日偏能縈寸腸寸腸
欲斷倩誰續拚教酩酊頽雙玉般勤惜別會何期
羨殺沙鷗同處宿

廟山觀梅憶施海廬先生詩以弔之

故人舊宅好規模廢址頽垣迹已蕪詩酒自娛陶
靖節天人指掌卻堯夫如聞笑語人何在見慣扶

疎柳亦無

門前先生手植倒
垂柳一株娟秀入畫

世代滄桑眼底事可能含

笑卧黃壚

先生八十七歲而終未
及三年子孫他徙矣

戊子閏四月懷王玄珠用丙戌小春見贈扇

頭詩韻

老臣蒙難氣尤豪笑語如常義自高夢短炊梁元
是幻事同翻餅豈堪撓白頭結契仍無服青眼投
瓊未報桃今日思君懷舊誼臨風翹首不勝搔

許元功

元功字茂勳所居茭田老岸有烏白數株干雲蔽
日秋時紫綠爛漫如錦帳茂勳構高閣於其間嘯
歌偃息蘊義感物每發於詩中年遭喪亂家計窘
枯埋照于酒酒酣落筆歌哭淋漓忠君愛國憂傷
哀怨之情一并流露或寫蘭數筆署名更生人亦
以更生稱之往往離家栖于蘭若屢空晏如而友
誼真摯急病讓夷解衣推食不以貧病改其素四
方名流來遊洞庭者賦詩贈答以當縞紵嘗同錢

牧齋九日登高莫釐峯頂牧齋賦詩二首茂勳次和至再有禾黍欲歌渾是淚茱萸方健未成翁之句牧齋誦之色沮少師事李副憲如毅與侍御灌谿交最厚茂勳病將死以生平詩稿一束封識授二子曰必囑灌谿作序灌谿哭而受之時與徐東墻及門生輩議私謚曰靜曜隱君遂名其集朱雲子余淡心葉聖野歸玄恭李暉菴皆有評論於簡末比之陶元亮鄭所南云子汕濠女冰素皆能詩各有集

古意

灼灼石榴花沉沉枝上葉綠色映交疏紅光分玉
頰日暮人未歸堂堦閒竚妾

積雨獨飲擬陶

飢來驅不去此時長閉門寂寞起行視惟有酒盈
樽誰共斟酌之形影自慰言但覺東軒廣無愁樹
色昏幽鳥知我意林翮亦來翻旣飢復不醉何以
報吟魂

卧病擬陶

人生乘運來病即去者機未去而且留後期翻自
疑庭前遶嘉樹戶牖列書詩假若即長寐今日復
奚知

十日陰不開今朝始日出扶杖起牀前若為照容
色十年一青銅嘗任浮埃蝕何況今朝人并非鏡
中質

吳門逢朱朗詣因寄施仲清

亂後幸生存又非千里隔胡為望一水十年空歎
息吳門逢君友歲暮朔風急躑躅四五言寒城沒

殘日

園中雜咏

衆木澄高陰籬花匝其下惜此清和天景物美首
夏撤窗風動襟竹榻面書架尚帶夜來醒清泉甕
中瀉老僕勤菜畦隣家問桑柘欲赴酒徒期疎懶
行復罷

灌谿夜話

寒城易暮色倦客鮮歡懷園林幸接近時偕尊壘
來兼得兩三友諧謔無嫌猜論古有餘思停卮心

徘徊蕭蕭前除霜
嗷嗷鴻雁哀攬衣
發長歎月白煙初開

放懷

昨日天地窄今日天地寬
賴此一林風吹失愁萬
端我生既經過倏忽五十年
縱復五十年視前如
飛煙日月自照人花草非我妍
寶茲今朝意聊畢
區中緣

豆香亭歌贈嚴用晦

飲酒豈必金谷園
賦詩豈必沉香亭
幽人籬落別

有致豆花豆莢皆芳馨
桑柘陰中春景暮鳴蟬葉
上秋風度並是亭邊得意時
豈須有客愁無具君
不聞楊惲拊缶歌
古來落萁何其多
又不聞子建七步詩
同根相煎未已時
但令花開子復摘
巢林一枝已堪適

院
王五癡積列朝銅錢鑄佛五軀
送供虎邱禪

富兒積錢買綺襦
王君積錢塋金軀
人笑積錢何其癡
王君却異富家兒
積多輦奉良工手
在冶龍

氣衝南斗天神八部集庭除果然相好非嘗有當
時開闢大聖人元是西來佛子身今日借君聊示
現大千佛日終常明虎邱行人皆歎息堯祠禹廟
空蕭瑟

梧宮秋

吳王城郭臨江水歷盡興亡只如此白蘋紅蓼颺
素波向來吹落何其多不見昔時吳王宮屬鏤賜
罷冶城空越王臺上集飛鳥吳宮先落梧桐風宮
中金井汲銀瓶白玉牀頭酒未醒盡道繁華如昔

日豈知桃李會飄零只今禾黍歌未休那得更為
吳宮愁

五畝園主人種菊歌贈劉子問

飢人知慕灌園叟幅巾野服菽五畝况是為園盡
栽菊主人還具高人福五畝之外幾頃田種秫種
粳誰當先有菊已足兼糒糧無酒有菊空徒然昔
時就訪花便好今聞籬間更窈窕開時索得酒如
泉南山當戶秋霜老

蘭燒歌

甲午冬寒百年未遘江南好事家蓄蘭十
不存一時並火焚其葉謂如野燒異煖氣
助生也李文中命予作蘭燒歌

長城朔氣無衰止隨指嚴寒越江水半夜冰堅凍
轆轤湘靈色怨幽蘭死物情灰劫固有期詩書曾
值祖龍時終然郁烈異凡卉吹氣聞聲尚得知招
魂為道春風好處妃貽珮要終老莫使玄芝歎不
休王孫腸斷空芳草

登妙高峯次韻

妙高峰上望七十二峰西山暝月嘗滿床空雲亂
栖鶴翻天勢迥鳧落水容低豈望先沽酒容余得
自攜

李文中園齋夜集限韻

正月連風雨春寒減復增出門愁似失中酒老還
能圍幙催燒燭停甌聽琢冰安心栖托好歸夢摠
無憑

舟夜

氣肅高天夜寒星帶古城煙中家百里篷底月三

更羌笛淒風短漁燈徹夜明鄉心隨水闊漸喜動
橈聲

舟曉

橋門日未吐光射半溪紅回首又明月碧流如漾
空衆山朝爽外一水客愁中歎息此時景賞心誰
與同

訊姜如須病

擇木棲方定驚來幾度春那堪流寓病更是亂離
貧問酒尊諸市看花支遁鄰相思芰荷裡難待寄

秋尊

寄李仲木寧羌

遙識開簾坐城頭看鳥還春生秦地草月照漢時
關萬里書難到高堂夢正閒故園頻盼望匹馬問
青山

納涼庭荷側有感

踏月忽驚水看荷真在舟葉藏螢照徹蘂瀉露香
浮半臂兼歌扇搔頭益酒籌舊時風景在清絕易
為愁

停裝

兵過舟還斷停裝又此晨昨宵先別友獨坐易思
親霜白城邊路雲陰野外津柴門雖改歲人事恕
長貧

懷徐蘭生朱長孺徐禎起

商風吹圃色望裡劇懷人谷晦愁如夢廬空醒覺
貧江楓兩地老山月一痕新縱是平生分難言若
比鄰

鄭薇令見過郊菴有作次韵

登高昨何處餘興肯來過荒寺經風雨蕭蕭葉滿
坡殘陰生野水秋色上田禾余亦栖遲歎閒雲在
磧阿

送沈古乘北遊

握手今何別燕臺五月遊知承老母意不負故人
求急雨趨沙溆涼風上驛樓陵園搖落盡莫問漢
時秋

哭張草臣

一入閭門道其如室宛然雖留書亂榻已絕婢傳

箋愛子先時淚新齋幾夜眠廿年尋訪處今日罷
停船

侯月鷺訪集因贈

空林亭午靄微霄門外高軒問寂寥入坐無言酬
主客把杯有思屬風颺五湖秋晚遊方倦老圃容
多寓亦僑若向南山還射虎好隨征馬去蕭蕭

寄李灌谿姜如須

峰頭木葉漸看刪一月人歸卧碧灣喜比黃金猶
有菊慚非白玉也顏山當年橘柚曾包貢何處梧

桐尚剪頰明鏡不須新髮向秋風難檢舊時斑

懷曹秋岳

秋城漠漠接湖陰菊蕊初淒夜思侵酒醉名園花
外遠梵聽蕭寺雨中深囊詩已欲空前草馬首何
時向故林一望津頭煙霧滿振衣嘗自上高岑

九日雨中武子玄恭同泛虎邱

風約山頭快把觴朝來風雨興仍狂不愁蠟屐全
沾滑但惜萸囊未佩香古劒池中秋有氣胡姬鑪
畔晚多涼茲遊若問風騷勝恐遍湖山只野航

新年訪侯月鷺路易公安卿鄭世貞薇令諸
 子傳飲屢夕次韻
 傳飲桃村類轉蓬天涯兄弟調能同樽前白髮人
 還健世上青山路未窮無數春燈疑好月半開梅
 萼耐淒風閒園共許晴相問那得低雲便掃空
 次侯月鷺韵送梁正愷歸粵東
 何日琴尊更往還五千餘路此離筵共憐短髮飛
 霜裡獨送輕舟落雁前庾嶺花香逢臘月閭門柳
 色憶明年遙知鄉邑欣重見幾處春風掛杖錢

哭姜如須

空文自見寧君志四十年光石火流堂上素絲千
 里淚空中孤影五更愁天涯誰夢來元伯夜雨真
 成憶子由謂如農令兄他日過廬還慟絕要離塚上望松
 楸

陪錢牧翁登朱珩壁縹緲樓

好山何必峰全露最喜初登霧未開林屋雲霞常
 映帶石公風雨欲飛來白蘋漁艇炊煙出紅葉人
 家夕照回對酒放歌應不惜淒涼直北是蘇臺

中秋夕寓祇園菴徐武子招飲同禎起賦
牽船難住借招提月夕幽尋過隔谿光散一庭先
露白影移高樹待烏栖何人湖海眠蓑笠有處關
山怨鼓輦莫道舊狂因病改百壺飛送醉如泥
施則民忽有清源之別詩以送之

四月湖堤柳色深蒼茫分手亂愁侵貧裝一夕何
由辦好夢前途或易尋江上野花開客眼驛邊歸
騎說鄉心萸茱莫忘吳山約兩鬢風霜更不禁

秋日感懷

十年征調盡天涯賣劍買牛事尚賒三楚下流防
北固夙聞通道戍仙霞妖星白晝能叅日巨浸高
秋涸見沙銷竭臣精老眼眊莫教血戰混龍蛇
偶檢雲間董張兩大宗伯故札有感

九峯佳氣接星文僕御欣從早歲勤一代幾人同
斗嶽千秋何處有機雲青藜喜降柴門杖白練慙
留舊日裙盛世風流瞻漸遠典型此日寄懷殷

將出山晤李秋旻聲伯先寄

積氣城邊水上涼故人音斷雁鴻傷千年萼蘚三

秋雨九月茱萸一夜霜布局失先元是短致窮有
具媿稱長蒙君許我公榮外醉踏林梢借石床

同灌谿弔葉聖野次壁間韻

八旬老母七齡兒重到堂前兩故知舊事滿懷尋
僕語西風吹雨出門時

許汕

汕字宸卿號竹溪茂勲長子少承家學束脩自好

秋夜有懷吳門李灌谿先生率成短章

秋氣薄青旻芙蓉冒芳池城闕在天上景星清夜

垂笠澤煙波闊寸心獨有思所思惟我公樂道印
園宜高年復慧命鍵關自委蛇清衷貫秋日禪悅
煦春風只今天壤間如公豈有同月明輝素鶴雲
影蔭疎桐歎息瞻仰間銀河迥碧空

山居四首

性愛林巘趣常同麋鹿棲泉聲幽樹裏鳥道亂峰
西流覽隨時適忘機與物齊廿年招隱賦可以樂
天倪

策杖倚前岡清風引興長山花供笑語野老話行

藏竹密禽聲
脆溪深荇藻芳
歸來還自飲
唱和憶裴王

日暖山雞舞
天晴松鼠鳴
風來時展卷
花落自和波聲

索居時序感清嘯
倚長松性靜紅塵遠
年衰白髮鬆編籬
移石助採藥帶雲春客至
欣談舊村醪盡日供

送別牡丹

飛來瑤島仙家種
却喜人間老眼看
香影戀人新月淡
臙脂鋪砌落霞殘
太平天子千秋恨
曠達莊生一夕觀
消受自慙清福分
醉吟留得碧琅玕

思菊

存二

滿庭風露冷
柴扉何處離
離菊漸肥未到重陽先
擬醉即非元亮亦應歸
林聲蕭瑟枝宜護
夜色冥濛影尚稀
從此金英期共摘
西山未許獨冷薇
寥落窮居過半秋
黃花未覲不勝愁
可同霜月偕人玩
好伴茱萸共酒浮
解綬名卿家有瑞
贈釵淑

媛句能酬無端此日來相探贏得蕭騷風滿樓
奉懷灌谿先生

碧幢秋色罨庭苔坐卧夷猶户晏開明月池亭閒
獨鶴清風門徑老三槐高僧靜對空羣有古史翻
殘歎劫灰最是閒來棋一局竹窗幽鳥夢驚回

憶鄭薇令施彪文二丈

碧山流水仲長園落日秋風百鳥喧種樹遣懷餘
隙地著書娛老有竒言煙霞歷亂雲依岫梧柳蕭
疎月在門大隱不妨廬近市桃村雞犬即桃源

高園古木曉霜稠涼思蕭蕭絡緯秋絳帳不垂人
自淡青山未買地偏幽雲移花砌留香影雨過池
塘滙細流最憶醇醪能貯足頭銜不媿醉鄉侯

許濠

濠字少卿號達夫靜曜季子明敏樸誠修辭砥行
鄉黨稱為長者

張漁村招遊虎丘魚訪梅澹香隱居沽酒旗
亭載月而歸漁村倚舷浩歌有恰是春江花
月夜之句因用作起句成長歌一首

恰是春江花月夜山塘隊隊醉人歸桂棹蘭橈香
霧合珠簾畫閣玉簫飛賣花人家燒高燭賣花女
子顏如玉可憐千古風流場幾人曾把貞娘哭君
不見虎邱山後梅澹香驚人好句滿奚囊遨遊天
下不得志歸來高卧白雲鄉丈夫遇合會有期安
能齷齪求世知感君意氣真半日作閒人對此融
融艷艷之煙景豁我浩浩落落之胸襟已矣哉歸
去來吳王宮殿多芳草莫教更上姑蘇臺

秋雨歎

秋令司成物天心曷改移浸淫兩月雨攢盡萬民
眉樵牧深潛跡鳧鷖浪得時孤燈淒旅館委化復
奚疑

陟靈岩有感

勝地重來續舊遊疎林塔影冷如秋莊嚴空向招
提問龍象都隨霸業休硯沼尚餘寒溜咽琴臺無
復古音流蒼涼極目憑西眺笠澤煙波起暮愁

許元

元字伯贊家素饒裕而能折節讀書締交名士有

濁世佳公子之目

山行即事

野屋雜林次衆峰立青天嶺半閒獨往有若行樹
巔覽勝倚石坐細草同輕綿相對只雲鳥真意難
自宣樵子笠自糾樵女髻不編寧知採薪樂不問
堯桀年持斧向古木谷應聲琤然春風一飄蕩梅
花滿流泉耳目寓至理忘情即神仙嗟哉前峰色
終古青嬋娟

今閏中秋同友月下看桂花

坐看相對數鬚眉香裏傳杯興更奇好月一番重
賞玩中秋兩度費吟思不緣覓醉身先到別有深
情客未知今夜樓頭同笑語庾公千載是吾師

許振光

振光字起文號玉晨伯贊之子爲諸生有聲於時
棘闈文卷屢薦不售性好賓客喜吟咏有得閒草
鼓缶集秣陵遊草諸刻行世徐子能元氣集稱其
厚不露骨深不露才有悠然之致

種蘭

濁世佳公子之目

山行即事

野屋雜林次衆峰立青天嶺半閒獨往有若行樹
巔覽勝倚石坐細草同輕綿相對只雲鳥真意難
自宣樵子笠自糾樵女髻不編寧知採薪樂不問
堯桀年持斧向古木谷應聲琤然春風一飄蕩梅
花滿流泉耳目寓至理忘情即神仙嗟哉前峰色
終古青嬋娟

外今閏中秋同友月下看桂花

坐看相對數鬚眉香裏傳杯興更奇好月一番重
賞玩中秋兩度費吟思不緣覓醉身先到別有深
情客未知今夜樓頭同笑語庾公千載是吾師

許振光

振光字起文號玉晨伯贊之子爲諸生有聲於時
棘闈文卷屢薦不售性好賓客喜吟咏有得閒草
鼓缶集秣陵遊草諸刻行世徐子能元氣集稱其
厚不露骨深不露才有悠然之致

種蘭

蘭為王者香比德於君子披披衆艸中未嘗自為
美有德懷芳馨衆草自莫比吾得與之親幽香染
衣履彼夫蕢菜菘望望遠將徙

托根盆盎內所資僅尺土種蒔非得宜何如在湘
浦灑濯汲清泉灌溉有時雨風日孕靈秀花蘂如
可觀氣盛養亦和幽香方得吐

密葉青扶疎林立相次序願言慎寒暄顏色常如
許靜夜月延照清晨露零滑猗猗似有意葉葉隨
風舉蘭居吾齋中自謂得其所

蜂股帶花歸資糧出採擷蘭珠獨背負供御表臣
節始信為國香服媚齊一切環瞻吾階庭玉樹同
在列雷雨正奮盈新芽倏將茁一室香風吹炎天
氣凜冽遙憶無人境紛委如積雪

題金天立觀濤圖

山外有山水外水神禹著靈跡始此特開一缺受
歸墟從此紅塵隔城市不然車馬得相通雞犬驚
喧竹石証斯樓巧構正當缺枕山襟水遊虛空既
稱廣爽復幽露松聲濤聲互吞吐樓外重湖接遠

天樓中山色青無數內湖緊抱外湖寬一水分為
內外觀有時風起浪湧白有時月照波生寒飛雪
漫空更奇絕四聽無聲冰欲結只疑渾沌未分時
一片玉光上下徹吾曾把醖坐窗中炎夏忽覺如
冬隆披襟舉袖幾飛去攀檻大叫驚羣公主入胸
中貯萬卷位置結構洵盡善晨夕登臨得大觀何
必出門看軒冕

冶城山

吳王志欲吞中國氣合忽來歐冶子採金鑄劍成

龍文頭白畢將晉鄭指三千魚腸散何處冶城塢
近蒼涼峙山川拱揖靈秀鍾收盡炊煙晚霞紫金
精流入土花赤淬劍小池清澈底液化當時劍未
成躍身赴冶電光起古宮鐘動夜深魂萬山落月
搖江水

聽鳥航歌為萬孝祥賦

羔跪乳鳥反哺衣冠中人翻不如天性乃獨鍾毛
羽樸邀之子倫所敦事亡父母儼如存烝嘗一室
僅容膝舟居非水蓬可掀屋上鳥啼人不寐一聲

聲是思親淚昏月晨霜木落時
愾聞憫見身難恃
小窗擁被坐陰森啞啞分明孝子心
九原可追夢難續
蓼莪今日為君吟
君不見父棺暴露未歸土
日向雕闌調鸚鵡

曉行

客夢未安枕僕夫喧前庭溼衣知墜露
遠火亂殘星
夜氣忽如失曉光惟一青勞勞車馬意
旦夕豈遑寧

臘月八日同吳不官平嶺看冰

五湖俱一白水復結雲英山意方靜古寒威生甲
兵松濤聲少應雁陣影逾明殘臘津難問何人履
險行

香花甲為施佩宜賦

昔有鄒先輩湖中始採蓴今來施隱士寺外獨尋
春久屬僧家秘方為世上珍芬芳多擷取何似竟
沉淪

同周若予登清涼山

滿目陰森一徑開清涼全勝雨花臺江拖遠練山

同曲雲護禪房樹作堆天闕好風吹酒去石城斜
日送詩來秋深更擬重携手步入丹黃肯便回

賀路安卿七夕納寵有序

鵲橋暫渡天上舊聞鸞馭初臨人間巧合

來從金谷幸季倫之留得綠珠約自冰人

鄙衛公之竊攜紅拂教成歌舞用盡黃金

姬姓陳為朱珩璧家伎贈與衣裝謝聽白雪遣姬嫁妾達

人表其曠懷選色徵聲俠士銷其壯志寵

愛等之掌上阮郎奚似劉郎雲雨託之夢

中神女豈如仙女即使悲歡判于離合孰

云新故難于笑啼先接雲容芍藥為牡丹

之婢安卿先于雲間納一妾遙瞻玉宇小星代明月之光

對伊澹名利心腸偕老即堪共隱借此適

山林興致消憂亦可忘餐我見猶憐決平

陽之無妬芳年正及卜有媯之克昌露氣

秋清齊唱瑤池之曲花陰夜靜同吹緹嶺

之笙

三生私誓許誰知天上人間共一期星過鵲橋河

已失仙來牛渚石俱移少年歌舞花當檻靜夜琴
尊月映池舊是案前雙玉史茫茫煙霧會應遲

讀周邵自和章有感再賡前韻

有序

誦君和章動予深慨出家姬以佐酒投轄
之風可追演妙劇以娛賓遊仙之夢如在
合樂洞庭之野山水助其清音取材齊趙
之鄉梨園遜其法曲陋功甫之花晏笑夏
侯之妓衣豈知綠髮不恒鏡中改換黃梁
未熟枕上欠伸是以開閣謝眼前之緣換

馬為身後之計極平生之悲歡離合因作
戲而即真摹古人之警咳衣冠遂破幻而
為實琵琶輕弄曾思錦帳年深琴瑟初調
抑念玉簪恩重事隨人往境逐時移嫋嫋
餘音繞梁塵而未墜僂僂弱態附花影而
欲搖觸景興懷亦有溼衫之司馬撫今追
昔豈徒顧曲之周郎

問名先是十年知朝暮巫山隔幾期楊柳當時嬌
獨占松筠此日靜無移堂前歌舞人如霰鏡裏嬋

娟影在池我亦雲津逢盛晏姍姍記得出來遲
金陵懷古

潮打江洲東復西六朝金粉迹都迷幽禽不識興
亡事花落花開任意啼

三閣香流太液波深宮倚醉舞纖娥君王自不行
方便枉向詞中怨孟婆

水火相持堅莫破黨人全不管山河小朝廷了家
何在金穴銀章夢裡過

投鞭江外已嘶馬唱佛宮中尚咏詩國柄誰操憑

浪子至今煙雨泣瓊枝

披草立朝曾未定恩仇報復已紛然誰云江水流
難駐五馬東來過百年

守將有時煩射矢開門早有篚筐迎金湯不比人
心固蒸土何庸漆夏城

夏日過太湖作

太湖雲氣與天通雲內常垂五色龍一夜甘霖遍
郊野不知變化出湖中

許五聚

聚字星瑞號禮耕玉晨之子儀觀瑰偉才情藻麗
少遊國學大司成宋蓼天先生雅重之學詩於龔
合肥吳門徐子能稱其具禮而微信然

龍潭晚眺

暝色寒潭合蒼茫入望孤洲邊歸宿鳥樹杪出浮
屠燈火遙相映星河淡欲無昇平思往事此地一
蓬壺

于少保祠

宗社艱危日乾坤賴獨支如何南內出翻恨北迎

遲臣節曾無愧天高痛莫知空山香火地灑淚讀
遺碑

高公謁劉雙山都諫

蟬聯甲第重西州聖主恩波眷顧優鳳詔揮毫傳
盛事龍門倒屣羨清流憂時每出櫻鱗疏悟主時
陳補牘謀慚媿桓榮門下士春風絳帳許從游

寄宋蓼天大司成

玉階端笏侍承明兔苑風流第一人盛世文章推
館閣中朝禮樂重名臣傳經虎觀淵源遠立雪龍

門道義親翹首五雲疑咫尺桃花千樹帝城春

湖中感興

荇菜參差滿畫橈吳歛低唱酒微消蒼煙此日埋
金埒紅雨何年涇翠翹賸有好山留淺黛已無垂
柳學纖腰空教俯仰千秋事白傅風流孰可招
魯山道中
高原無地不飛沙綠樹依然夾道斜猶見元公遺
澤在早乘春雨藝桑麻

平原曉發步吳式範韵

曉鐘催起過嚴城淡月疎星逐隊行我馬已瘖途
正遠鳳樓天際不勝情

過河西務

蕭條廢郭枕晴川京國南來第一廛權政已知虛
會計君王不貴水衡錢

看山

溪山無盡路難分款段蕭蕭對夕曛怪底亂峰千
疊處每當欲斷補橫雲

許永鎬

永鎬字旣受號在亭禮耕長子縣諸生以歲貢選授金壇縣學訓導陞懷寧縣學教諭俸滿改授福建延平縣縣丞時年已七十意氣勃如不憚崎嶇而徃在任三年以慈祥稱其告歸也閩士人書頌言送之云兩任廣文多士頌先生好好三年貳尹百姓稱土地公公迺大喜以為真月旦也榜于所居之澹峙堂中先是康熙

年

御製飭訓士子文頒行天下時永鎬秉鐸金壇做大學衍義衍為二綱領八條目以宣揚

聖意儀封張大中丞撫兵建紫陽書院以教育士子月課宣講命永鎬董理之且親書孝弟人家匾額以示旌異旣老自為墓誌有達生之旨焉

喜兩次陸幼凝韻

春來憂旱魃溝澮欲生煙三日雨如注千村水滿川官閒宜志喜民樂得高眠獨笑盤餐客家無負郭田

賦得投閒不是愛偷閒四首

投閒不是愛偷閒五斗羈縻兩鬢斑徒擁琴書栖

泌水敢誇經濟卧東山鍾期到底成知已鮑叔而
今變老慳玄草不須勞剝啄呼童且復掩柴關
投閒不是愛偷閒西蜀南陽豈易攀丹詔不聞徵
鳳翹青氈那許覲龍顏趨鎗金闕勞魂夢潦倒文
場數往還濁酒一壺聊自酌敢將詩韵漫增刪
投閒不是愛偷閒自古行藏有幾般舟里潛踪輕
黼黻終南捷徑任癡頑賈生流涕功名外范子安
居廉讓間填臆牢騷無處訴日聽黃鳥語綿蠻
投閒不是愛偷閒腰未偃僂髮已斑愧乏全才遭

盛世僅貪半俸寄塵寰督郵循例容三揖鷗鷺忘
機立兩班旋看桐陰遮滿戶風來却認雨潺潺

寄王雲衢

良朋踪跡近何如楚澤煙雲任卷舒縱使難儲甌
石粟也勝空讀十年書功名已付形骸外泉石徒
存夢寐餘何處思君情更切披襟對酒說華胥

寄于鶴泉

少年湖海著高名磊落何慙漢賈生金水橋邊看
御柳岳陽樓畔聽啼鶯風華流露芝蘭秀意氣凌

霄軒冕輕鸚鵡莫教輕作賦好持三策頌昇平

五粟山

身朋親親世同

補敵寄王雲

對立兩班欵青麻劍

益世對貪半卦寄壘

七十二峰足徵集卷二十五

武峰吳定璋友篁菟錄

皖城咎壽民語石編訂

吳文之

文之字與成別號武峰海舟曾孫才性絕人讀書目數行下七歲能屬文舞勺遊庠未弱冠發解應天登正德辛巳進士選庶吉士有聲翰林以疾卒於京邸年二十九有才無命時論惜之墓在西金山下

賦得梅月贈僧

月欲出雪未消空山無人夜寥寥
禪房偶坐無一事月明正到梅花梢
禪心一靜萬象虛問師此意
還有無有無誰能說還問梅梢月

新齋

新齋聊可憇舊樹亦從遮護砌苔陰滿規牕岫影
斜雨驚秋枕夢風落夜簾花歌嘯從吾適悠然閱
歲華

贈張斯植

愛爾蓬萊客青雲氣夙生玉都騏驥足金殿鳳凰
聲酌酒山雲溼論文海月明秋來應有約湖上片
帆輕

下第留別徐內翰子容

上苑花零落燕南春色闌愁來非有約事往了無
端季子裘空敝荆山璞尚完晨朝頻看鏡君亦不
成歡

憶唐儀部雲鴈太學佩之

貧病歸來客常思陰與何向人青眼少贈我錦篇

多沙淨明書幌溪喧答棹歌絕憐違賞地雨笠共
煙蓑

答德深兄

池草頻生句江魚不寄書春來小樓興應似舊時
無對月開新札穿雲憶故廬忽聞添米價千里獨
愁予

秋興

湘簾欲掩翠重重長日幽居誰與同隔岸水高迷
過雁層岩雲暖綴晴虹坐看影落梧桐日情憶香

生齒蓄風欲到醉鄉知不遠青帘掩映夕陽中

聞黃季行消息

試檢來書憶故人此生吾已失元賓詩篇近寄何
能及消息初聞却恐真病裏無家金索盡夢中有
記玉樓新曲江零落花千樹北望長安為慘神

答顧戶曹

天上僊郎粉署尊封題千里問山村三旬三日方
齋食繞壑秋風靜掩門

早春

七十二峯

武山

卷二十五

春色東城又一年勝幢新貼綴花妍倍還風月能
如約恣買江天不論錢

吳絳

絳字尚茜與成之子性穎悟能詩賦少有心疾遂
廢舉子業

贈文湖年家

杳渺烟波阻別離廿年贏得鬢成絲青山白石歸
來處惟有寒梅是舊知

吳九遠

九遠字鳴鴻別號柱岳山人滄溟之子才氣凌厲
無前少補郡諸生慨然思爲當世用與吳門袁魯
望蔣國華金子材山中孔鳳崗葉四可爲文社發
憤下幃數奇不售年四十遂棄儒冠賦遂初詞以
見志所著有土蕘集漁樵集繼躅稿經史異徵等
書旣老自爲傳題其壽藏石曰有明太湖漁父兼
林屋山樵九遠吳子之墓

感興

東方有奇鳥翩翩鸞鳳儔失身在枳棘飲啄不自

由離羣異栖止衆鳥相喧啾朝鳴叫閭闔夕宿懷
丹邱願從三青鳥振羽歸瀛洲

冉冉孤桐樹生彼南山阿亭亭干雲霄獨立無偏
頗中林茂樗櫟枝葉何婆婆芘芘然自成類衆鳥爭
相過二物固並陳賢否殊清訛鳳凰下千仞棲止
將如何

蠶婦辭

提筐出南陌迢迢心自亟每愁桑不敷尤恐蠶不
食行蚤畏多露飼晚憂日是惟願繭絲多匆匆理

縑帛官稅并私逋急完寧貶值哀哉辛與勤一絲
不得飾娥娥青樓女新粧時改易剪綵作花鈿猶
嫌尠顏色

夢遊五度谿

夙志希名壤杳靄感相契寥寥真境中恍惚得所
憇風瀾漾清川霞彩標林際彼岸隔迷津諸峰聳
晴麗宛然法界觀邈矣無生諦杳杳嵩陽鐘泠然
悟身世

南樓新月

日下暮雲散夜靜天風吹盈盈河漢間纖纖明半
規南樓正晏坐清輝燦簾帷良宵不易邁心賞攸
相宜孤懷渺何許杳杳天之涯

飛龍引

芒碭雲氣成五采白蛇中斷血浼浼泗上真龍乃
御天天闕忽開震四海四海清風波平日月蕩漾
開晶熒開晶熒兮起二京四七之際炎火驚龍復
鬪野爭喧轟嗟嗟二龍乃天生妖蟒豺虎徒縱橫
四百餘載大業亨

遂初辭

有生之初兮脫然而來有生之後兮何紛紜之孔
哀炳元化兮無媒還大造兮胚胎

三烈婦詞

有序

余觀近代有三烈婦至元十三年元師渡江
至天台王氏有美色盡殺其家強脅之不可
驅至嵯縣清風嶺嚙指血題詩于石投崖死
至正間衢州陷龍游民婦何氏爲兵所掠裂
帛題詩投江死至正壬辰紅巾賊起掠江西

敖城曠家婦為賊所迫乃先刃其子題詩于壁遂自盡嗚呼烈哉作三烈婦詞

乾坤之氣何茫茫精靈炳煥成球琅孰知弱質生
閨房激烈慧性增光芒王氏何氏及曠氏三烈錚
錚振衰世從容殉節血嚙漬吐出心詞見哀思清
風嶺頭霜華明龍游江上虹霓生吉安江右鸞鳳
鳴三烈得此同晶瑩存亡二字何其榮江靜月明
魂魄寧涇渭清濁千年平七言一律如長城古來
烈婦知幾許能文能死誰堪侶男兒立身多草草

空負詩書歎衰老

附王氏詩君王無道妾當災棄女拋兒逐馬來
夫面不知何日見妾身此去幾時回兩行珠泪
頻偷滴一片愁眉鎖不開今夜清風江上月存
亡二字苦哀哉何氏詩妾長朱門十九春豈
期今逐虜塵奔失身無補君王事死節難酬夫
婦恩江靜從教沉弱質月明誰與弔歸魂只愁
父母難相見願與來生作子孫曠氏詩涇渭
難分濁與清妾身豈肯墮風塵孤兒未必從他
姓烈女何曾侍二人白刃自傷心似鐵黃泉要
見骨如銀溪山落日猿啼處過客聞之亦慘神

客自遼海來聞戚將軍方略

故人萬里至海上淨風烟胡馬南無牧邊烽夜不
燄將軍留客醉燕然城上絃歌月正圓數載羽書

無警報營門柳色掛春妍

贈方參軍浮麓

聞人時在戚將軍幕

南極微茫耀青海萬里遙分散光彩曳裾不作蒯
緱彈幕府春深野服寬折衝樽俎風清塞倚嘯營
門夜月寒醉書飛策駟城箭心期欲掛延陵劍陰
符賸註五千言漫說論兵能舌戰君不見信陵虛
左重侯生始知毛薛非常人英雄草莽自無盡渭
水從來一釣綸

維揚道中逢周十六

相逢握手停行鞭丰神灑灑凌雲煙短褐半百嗟
白首長歌五噫當青天君騎往南我北去壚頭有
酒囊無錢臨岐雪涕忍分袂相思還寄瑤華篇

冬夜同禁四可投彌勒寺

窈窕赴西岑僧房未掩門霜鐘疎暮靄寒月淡荒
原煮茗欲忘寢挑燈相對言丹梯向寥廓杳杳有
鳴猿

莫公遠過白下寓齋

斜日掛城頭鄉心起暮愁看君乘馬至無限秣陵

秋悅此山水性眷予鸞鶴儔出門見光采河漢天
西流

舟次越來溪

宵渺清溪曲迴舟勝若耶春波無倦鳥暖樹有驚
花越嶠行邊盡吳城望處賒前溪採蘋女日暮始
還家

送顧益卿奉使還朝

黃河九月上樓船使節翩翩散紫煙乘傳遙迎官
騎擁封章新灑墨花鮮恩沾特命同三省日近光

明尺五天戀闕望鄉情共切促程回首正蒼然

寄內

楊柳依依是別離西風涼雨未歸期機絲燈火初
長夜砧杵衣裳未授時兩地愁心忙裏老一天明
月夢中遲庭前黃菊開曾未閣上青尊好待攜

秋閨曲

夢裏書來未啟緘關山萬里枕衾前盈盈咫尺西
牕月同是良人覺後天

俠客行

千場縱博夜無眠赤手常贏十萬錢昨夜窮交扣
門急傾囊相贈笑無言

當壚曲

嬌娃十五笑當壚斜倚雲屏擊唾壺會罷酒籌無

所事漫拈彤管記新歌曾未聞土音喜我詩

吳學

學字世賢食貧礪行志趣高潔愛作小詩自娛

秋懷

城邊昏樹集昏鴉作客孤城厭暮笳自倚篷窗聞

塞雁江風吹老白蘋花

秋日泛石湖

縹緲煙雲接素秋白鷗泛泛水悠悠藤蘿碧處圍

僧剝楓葉紅邊倚釣舟

吳潔

潔字尚素

句曲早發

野店哭寒雞還家夢驚寤逆旅候朝餐僕夫促行
路清霜馬首飛殘月城頭墮衰髭結堅冰老眼如

障霧六十尚征途勞勞總虛度

春暮登雲龍山

逶迤蘚磴捫蒼蘿遠浦翩翩白鳥過試上茅岡望
鄉路長堤春杪柳齊莎

吳情

情字元中柚莊之後與弟愷悌俱能詩

輓吳健父

與君纔一覲數年仍間然跨鶴不復返空有才名
傳淒其復淒其花落聞啼鵑

寒園

歲暮荒園曲迷離但水雲空巖棲凍色老樹吐寒
芬細薜敲冰煮幽香對雪焚晚來詩句就題處有

湘君

吳愷

愷字允亮

同孔道行疑甫弟雨中作

溼氣入蕭齋陰雲結虛宇牆頭枯蘚活池面新荷
補湖上兩高峰煙籠青不吐幽期客自來清芬溢

環堵經春繼以夏所見惟一雨秧科早已腐何物
療貧窶看君愁更繁對酒不能舉

練瀆

練瀆水照兩峰闔於此侈軍容舳艫飛出馮夷
宮旌旗影射波光紅臺荒鹿走吳沼空黃蘆捲霧
生悲風

賦得秋鴻送葛稚孫

寒路迢迢入望斜黃雲衰草是天涯因風刷羽經
寒水帶月呼羣落淺沙菰米含香堪就食芙蓉開

老任迷花江城嘒嘒孤舟夜一片秋聲合暮笳

燕

秋去春來似有期去來曾不變烏衣尾分宮剪裁
雲入領帶桃花掠水飛王謝樓臺人寂寂昭陽宮
殿草萋萋玉京綵線空陳迹歲歲西風怨落暉

晚渡橫塘

一雁橫秋度遠聲輕帆遙指闔閭城漁舟釣罷聞
清唱水上高樓見夜燈

茅遠士花燭詞

花樣丰神雲樣衣
柳腰纖軟恰成圍
朝來漫倚欄杆曲
閒看雕梁燕燕飛

買山闢地半為園
手植先春不計年
歲歲雨前收月片
清香時供法王前

吳悌

悌字季慈

江浦舟中

望遠不知處掛帆日
又西疎疎烟柳外
茅屋報荒

雞

過山家

遠水暎斜旭空林帶落霞
百錢攜竹杖十里問梅花

花

吳春瑞

瑞字五玉海舟之裔家素封
能自整飭以詩書陶養其性情
吟詠間作不計工拙曰吾以遣病適興也
烏能撚鬚苦覓耶有詠風堂詩一卷

武峰晚眺

七十二峯

武山

卷二十五

古刹依青嶂寒流帶碧天
 鳥隨楓葉下鳧傍荻花
 眠風景悲殘歲登臨憶往年
 冷然發長嘯恍惚御
 風仙劫數今猶問於不信
 工紙曰吾以豈欲與
 偶緣春色好小酌遣情時
 花影浮清笋茶香泛素
 瓷夜闌風滅燭人靜月催詩
 坐久未成句空齋冷
 玉麈

春盡積雨

坐聽潺湲久蕭然靜掩扉
 年華隨病去鶯語出林

霏微
 稀細草和煙綠殘花帶雨飛
 眼看春欲盡暮色轉

初霽

入春愁積雨向晚睹新暘
 碧落雲容淡青郊草色
 芳山當晴更好花得露逾香
 最喜今宵月清輝射
 草堂

階前紅蓼

本宜近水栽移作庭中玩
 翠梗颺紅花時被風吹

亂

月下歸舟

曠野天垂暮月明樹裡度扁舟
泛月行寒煙迷去路

雨後登樓懷袁白公黃新侯殷銘倩

雨過山樓黛色浮涼風蕭瑟度蘋洲
太湖煙樹胥江月有客平分一半秋

吳之甲

之甲字公令號鶴村五玉之姪器宇朗澈神觀偉
然論列古今別具隻眼當時作者如祥符合肥俱

以國士待之吳門徐子能稱其翩翩裘馬有五陵
豪俠氣槩詩亦如玉燕臨風珊瑚出水清新艷逸
幾奪庾鮑之席元氣集中遴選百餘首生平所著
有橋社存稿北遊草笥香樓集

送公鑑弟之白門

我從白門來弟今白門去幾日山水間誰共梅花
語芳艸路含煙楊柳風吹絮分手兩依依秦淮我
無豫

冬夜懷徐而菴

懷人夜不眠長吟倚寒石石上月影清更深露華
白引領悵天涯遙遙一湖隔片雲起前山鴻聲破
空碧

題白雲書屋圖為王望如年伯賦

白雲何所自乃向帝城來白雲本無定時合還復
開先生屋下人一心無纖埃兩眼看白雲戶牖生
莓苔胸有經世學世稱王佐才初為執法吏闕海
聲如雷豈期鵬鷲姿忽罹鍛羽災詔逮繫圜扉天
網未為恢演易至明夷患難心不灰順逆隨所遇

皇恩亦浩哉稽首還鄉里舒嘯鳳凰臺清風吹素

琴明月照山杯天空雲自適道在人無猜

白雲書屋乃白

雲司中所居之處解網歸畫此圖題者甚衆

雨夕懷人

長安秋夜涼燕山白雲聚白雲入長安散作終日
雨美人隔天涯孤懷良亦苦挑燈撫清琴聊寄相
思語

公無渡河

公無渡河河溜難過險不可測深不可揭公竟渡

河身付洪波我不恨公去太急但恨妾身追不及
追不及兮妾奈何恨比長河水更多

蔡經宅

闔閭故國春風新漢家神仙初燕賓瑶天鸞鶴一
聲曉雲駟冉冉輕無塵王郎兩目光如電月姊星
娥欣識面手披丹笈指點頻半是龍文雜烏篆麻
姑綠鬢剪煙碎羽衣翩然花作隊犀香織爪落人
夢幾度風雷繞其背杳然一別經千紀赤縣神州
幾遷徙彷彿當年舊遊處年年花落錦帆水

雨後新月同何在宮用織字

餘霽淡天末一鈎露月織光將新漲映涼與晚風
兼倚閣快呼酒移花蚤出簾小橋疎柳下清影一
更淹

蚤

之蚤微細甚通體盡悲哀草溼響逾急夜長心不
灰長門團扇月金井輓轡苔一片孤燈影將人白
髮催

晚泊虎山橋聽鄰舟馮姬度曲

傍晚橋頭住虎山真有緣幾家流水曲一榻小山
前翠袖迴香雪清歌蕩畫船春衣如不冷月下更
留連

過弘濟寺訪程天羽和蒲庵上人韻

地迥巖何峻江深寺自幽鐘從紅樹出榻有白雲
留面壁看僧定開門任客遊與君閒話久星影見
中流

夜宿元墓梵天閣

勝地高僧在梅花萬樹稠林淡山月淡鐘靜佛燈

幽遊倦易成寐心閒且復留松風入虛閣高枕夜
悠悠

元夕袁籜庵招同張學庵太守杜于皇葉言
如集移鶴軒限韻

十二欄杆玉笛吹畫屏銀燭錦參差無風火樹光
何燦有月簾衣影自垂人盡解歌當子夜客因咀
句撚梅枝紫雲一曲春風裡太守居然杜牧之

梧桐

玉闌金井綠陰稠碧榦亭亭傍畫樓花放窻前清

露曉葉飄墻外夕陽秋疎砧小院人偏悄細雨孤
燈夢亦愁何似彈琴明月夜鳳凰一曲韻悠悠

夜宿梅語亭值周孔嘉他出

夜靜春山竟似秋梅花欲語若相酬伊人何處音
偏杳埜鶴此時棲更幽一枕清香通世外萬株白
雪在湖頭雉灣何異羅浮地明月當前照獨遊

無題

縱隔湘簾意自通冰綃髻鬢月明中雙珠作佩曾
遊浦七寶為臺好避風獨立却憐芳草綠相思又

見杏花紅黃鶯聲裡鴛鴦夢行則雙雙坐更同

題畫

平嶺一虛亭泉聲落秋色此中人悠然斜陽淡天
碧

立秋日

日落橫素琴蕭然風入林如何枝上葉便覺感人
心

月夜同李明山舟泊燕子磯

大江月色明如練百尺銀河倒不流吾欲乘槎問

明月海門風起正颼颼

皇駕菴 相傳建文帝曾避於此今改名積翠

穹窿山後有香臺此是龍孫出世開畢竟駕於何處去杳然空翠使人哀

秋曉聞角

長安城頭露華白殘月疎星曉天碧角聲不管旅人愁一時腸斷姑蘇客

題畫

江天渺渺一鴻影片帆直去蒹葭冷夜來歸夢在

漁磯悠然不負秋千頃

吳之藻

之藻字公鑑號默庵孝友謙冲家無間言與人交忠諒坦率不為翕翕熱而然諾不欺人皆信之年十七補郡博士弟子員試輒高等與山中之能文者結東湖文社一月面會三約課二互相切磋惟務實學不以招要聲譽為事中年以奏銷註誤知者寃之久之乃白得復其故物更闢入後進文場爭能角藝者十有餘載白首窮經益加研練羣奉

爲老成典型胞兄公令少負詩名集凡一再刻流
播寢廣公吟詠自怡不輕出示人沒後令嗣有邵
手錄編次請周漢隣席次文兩先生立傳作序藏
弃於家曰申右堂遺稿

題盛秋谷畫

盛君妙筆稱三絕戲寫雲山自怡悅煙樹晴巒景
致佳王維米芾都無別於中尤愛此空巖雲裡溪
聲如有舌前身應是邱壑人稱名畫師毋迺褻我
坐客牕苦炎熱倩君爲畫峨眉雪

冬夜讀書永福寺

最愛禪扉靜相尋安樂窩素心同硯席古處邈山
河竹裡清風冷梅間好月多壯心殊未已莫問夜
如何

一枝聊寄傲無事且鳴琴浩氣來天地深情在古
今寒輕林鳥伏籟息梵音清一望月如練斜牕花
影侵

三月下浣葉蒼舒公介陸靈昭金元台家玉
潤次程文讌于申右堂和蒼舒韻

韶光荏苒暮春天重集羣英泌水邊彩筆非秋垂

曉露文心似水湧源泉湖山自昔多靈秀風氣于

今屬後賢自愧不才慚太史攀龍附鳳詎能聯舒蒼

詩中以家與成太史相期故有末句

秋晚翼蒼程夫子招同王玉掌張大風程天

羽遊雨花臺

蕭蕭風葉下無邊相對名山思黯然三世芝蘭敦

夙好十年桃李賴師傳未能着屐隨安石猶喜攜

尊近樂天醉挿茱萸香滿座解醒還啜永寧泉

遊惠山

惠泉一壚風霜古傍晚維舟石岸西滿沼空明寒

沁骨半山蒼翠色沾衣波光不定霞光亂日色將

沉月色微帶得雲芽烹活水不須蔣酒送斜暉

拈花庵

攜手霜林石徑荒寒雲冷露滿禪房老僧不語聽

流水忘却山中日月長

成木志林山中作民夫
歸手歸林不歸荒寒
林林氣
民志歸帶歸雲寒
歸骨生
歸山

七十二峯足徵集卷二十六

武峰吳定璋友篁蒐錄
橘社金友瑄玉翰編訂

一朱右

王觀孫宮

右字 馬蹟西坵灣人有震澤賦見志書

木上巳登椒山

絕巘登臨倚杖藜
漁帆百疊望中移
花明水國鶯初轉
柳暗湖光日乍遲
玉洞箜篋仙子宅
滄洲杜若大夫祠
差池燕羽春天麗
正是蘭亭被襖時

七十二峯

馬蹟山

卷二十六

蕭然詩思誰酬唱古木叢篁一徑陰平野曠連山
入畫幽巖虛覆谷傳音無心忽攬江臯佩有句能
追梁父吟莫漫寥寥歸路晚忘機渾覺醉鄉深

朱 昱

昱字 成化間徵赴京師纂修兩朝國史

題吳王避暑宮 在內閣

楊柳風清水殿涼荷花無語妬新粧冰桃雪藕瑤
池晏千載令人笑穆王

夫椒弔古

霜刃交揮箭雨飛吳人得志越亡歸臥薪嘗膽君
知否只向蘇臺試舞衣

朱 魯

魯字得之號東湖才氣超邁詩文援筆立就議論
皆原本經史試輒高等食餼有年屢躋棘闈其門
下登會榜者七人成化間以才學薦與修國史給
七品冠帶卒年八十餘崇祀鄉賢學者稱為東湖
先生云先生所最心折者宋丞相文信國少日輯
其逸事為忠孝外傳系之以詩序曰余素慕文信

國之為人恨不生同其時如杜許鄒鳳諸人從公
 以死閔處興思採其事實為忠孝外傳演詞曲以
 發舒之忽又猛省詞曲鄙俚恐褻我公在天之靈
 勤勤懇懇勉作律詩四十四首務正言之庶幾不
 得罪冥冥中也乃若詞曲久當自廢百載而下俾
 夫人脩知信國公忠孝事實者幸或有此存焉

閒居

草蒲為履葛為巾寂寂荒村寄此身池館雖無尋
 丈地林花自有十分春坐忘水面觀魚戲睡足風

前學烏伸縱是吟詩有佳句山空欲語向誰人

同李石泉西橋兩公遊官長山歸飲燈下

山名官長五湖中此度登臨樂少同三兩白頭翁
 作伴一枝靈壽杖飛空無邊光景撩詩思多許雲
 霞落酒鍾歸到華堂渾不倦殘杯還對燭花紅

宋文丞相忠孝外傳詩四十四首 存三

朝廷敬賀得人奇古諛忠肝早見知開慶間王應麟充讀卷官

至第七卷頓首曰是卷古諛若龜鑑忠肝如正切

鐵石臣敢以得人賀遂擢第一即信國公也

賜羹畱肉念敢忘作客袖柑時原傳有作客懷柑年已過賜羹畱肉

事堪希 風霜棹遠迎家慶雨露恩深慰孝思難得

故人珍重意華門相送赴京師其一

天驕敢笑帝山河慣見中原主議和選將為聞丞

相疏磨刀欲試浙江波南風不競塵難埽北道乘

機凱欲歌忠佞同朝誰辨得華夷氣數竟如何其四

十年胡騎戰中華破碎山河落日斜未許行成畱

越使相將問鼎到周家茫茫國運天難問鬱鬱忠

腸事可嗟淚洒英雄渾是血憑風吹染杜鵑花其二

十一

朱璜

璜字斗輝東湖七世孫

題栖雲菴

積翠當軒落雙泉合澗流松牕稀見日花徑曲通

樓茶話空山午棋聲六月秋浮生無着處喜被白

雲畱

梅花百詠用中峯禪師韵 存五

一枝瀟洒具全神昨夜前村記得真花發看他仍

舊色夢回憐我獨眠人疎燈自照空潭影濁酒堪

澆俗念塵說與隣翁好消息明朝有約試探春
勁有根株瘦有神一番徹骨見天真不將顏色動
流俗只對羲皇以上人向背枝分南北影光陰花
判去來塵吟香弄粉輕輕思着月籠沙淺淺春
迷離煙雨不疲神霽後迎眸意更真號水仙兄名
不愧是支離叟意中人孤山隱逸三更夢萬里風
霜一騎塵富貴從他今日愛且先占斷嶺南春
祇換光陰不換神天然香粉傳來真君時向我開
口笑酒不醉花愁殺人剪雪栽冰詩有味凌霜耀

月眼無塵淡懷適得閒中趣自是山家繞屋春
奇根作冶倚何神事憶南陵恐未真彩筆已成枯
樹賦閑潭又夢落花人一寒至此每徹骨不曰白
乎寧染塵最是坡仙詩有味舉杯付與羅浮春

先東湖公所著宋文信國外傳目錄詩表彰
忠孝發潛闡微有一唱三歎之遺予欲追和
愧無傑句因集杜十章敬見信國不幸之遭
并先公拳拳之意鄙懷有在聊當執鞭諒亦
前賢之所許爾 存二

干戈衰謝兩相催
潦倒新停濁酒杯
離別不堪無限意
安危須仗出羣才
殊方日落元猿哭
城闕秋生畫角哀
洵洵人寰猶不定
一生襟抱向誰開
蠻夷雜種錯相干
直道無憂行路難
遠愧尚方曾賜履
愁看直北是長安
炎方朔雪天王地
孝子忠臣後代看
心折此時無一寸
衰顏欲付紫金丹

朱良佑

良佑字太和東山朱巷人
頎然身長音如洪鐘好
爲人解紛排難有魯仲連之風
開酤坊於金陵與

賢豪者遊揮金結納友朋
緩急恒恃以無恐時海
忠介公瑞爲南都御史鐵面
霜威鋤擊豪強不少
貸聞良佑名嘗微行過其
酤坊目之意釋後夜復
至問主人能飲乎曰能能
奕乎曰能遂坐斗室飲
奕達旦海公諮以時事具
以所見聞對久之良佑
爲劇盜所誣引有司上其
事海公識良佑名立出之
公卒於官良佑往哭弔之
以詩都人士爭相傳誦以
爲實錄國史書曰洞庭山
人朱良佑弔之以詩云云
海公居官崖岬過峻同列
不無忤嫉者身

後無嗣櫬莫能還閭閻好義之士雖欲賻顧無敢
窺左足而先應良佑義形於色大言於衆曰有官
如此忍使其骸骨不歸故土乎乃置櫬中衢首以
百金投焉人爭趨之三日得五百餘良佑治裝扶
櫬歸葬於瓊事畢向墓長揖曰朱布衣從此遯矣
所著平倭志紀異錄留京偶筆家訓已無可考

哭海剛峯都御史

批鱗直奪比干志苦節還同孤竹清龍隱海天雲
萬里鶴歸華表月三更蕭條棺外無餘物冷落靈

前有菜羹說與傍人渾不信山人親見淚如傾

朱鳳章

鳳章字羽文歲貢生胸藏經濟才氣豪邁規畫時
事落筆數千言識者躋之歷遊齊魯燕趙之區思
有所建白而所至輒相左歎舉世之皆醉幸五畝
之可歸遂高隱山中與陸仲飛葉梅友嚴開一輩
結詩社朱氏多才羽文稱巨擘焉

懊懷曲

嘗相憶唾花染儂衣悞點芙蓉色

向人未敢語閒聽機中音往來自爾汝

菱湖秋

清漢凌霜飈菱葉資新漲五湖東一角茲名昔所
尚莫釐屏天南酒城適左旁溟茫萬頃間變幻發
奇狀畸人固好游放舟歷淵曠少皞傳秋清日月
同磨盪曳夢蘋香幽隔浦聞漁唱西風起無端銀
海生高浪天吳與波臣咫尺疑相抗白日忽云匿
明宇作煙障行吟澤畔人覽此增悲壯昨爲鏡中
游轉盼開奇宕五雲沒何處指顧不可望百靈隨

濁流湘君亦悽愴吾生值風波形骸迷骯穢夙聞
西皇至降澤盈漭漭魚鳥樂煙蕪游翔愜下上載
讀秋水篇浩然得深養

放魚

水清魚難容水濁魚易死惟願川原深魚乃得所
止網罟日愈嚴澤梁幾盡矣大魚不盈尺小魚短
如指既以供我欲漁利復及市鱗觜胡足惜當亦
憐頰尾偶遇自我手忍使戕生理縱之脫釜鬻悠
然逝遠水風波固不畏游躍爾莫恃那得浮沉高

毋令觸香餌

登宛伊閣聽主人彈琴同魯元微同看落照
恒照若易斂大音忽歸空對茲山水際澹爾開明
聰暮江散幽響几榻餘清風波濤萬里靜孤閣流
光中天地得有暇魚鳥隨無窮賞音愜知己片月
來高穹

入都門馬上口占

侵曉登皇途行行策我馬忽見大都門氣象失山
野平居高尚心至此自覺下門吏叩行踪知非浪

遊者十年君子懷我憂當一寫

慎念茲亭中觀靈巖石子歌

空林雨過涵山碧几案泠泠列奇石知君蒐盡雲
根靈琢玉鏤冰展清癖吳中好石凡幾人靈頑未
辨亡天真出君所藏聽君語驟令心目開幽神湖
天景物何時集霞樹雲山鏡中立恍忽西觀濯錦
江琉璃迸破鮫人泣孤亭遙揖靈巖岑雜花掩映
秋光深若見米顛袍笏在却令朝士羞黃金

畫蘭歌爲海陽孫銘常作

山堂昨夜聞新雨几上吳箋展秋水江籬夢斷香
草生湘浦遙瞻莫煙起海陽公子寓中峰九畹攜
來老筆踪香圃墨憨花發處露凝雲立山重重觀
君命意非草草顧影憐身亦自好楚臣遺佩動哀
吟盍向空林各善保

送王樸庵還白門

扶輿氣薄消名理讀書往往趨朝市冥頑喪檢不
知遷忠孝遂亡真種子王郎負氣軼群倫求志須
能盡子臣爭誦烏衣舊公子誰欽眉宇真天人獨

泛一舸凌萬頃山靈七十爭奇逞探幽載筆復同
僧索我桃源未歷境玄黃血戰溷天淵我老蓬蒿
已廿年多君具眼問奇士形骸意氣非茫然君來
傾蓋稱知己金石同盟在星紀芙蓉鐔冷半生霜
誰謂風雷呼不起逢來別去豈無心楊柳青時擬
再尋旦暮相思千古事鍾山笠澤同高深

看劍歌

喔喔雞聲呼夢起倚牀三尺明秋水眼光歷亂波
濤生久識英雄心未死酒深十日平原尊酣歌狼

籍歸柴門漫說伊人具肝膽不平何敢向君言

同調歌

天地兮運有塞日月兮時有蝕我與爾心交得東
海濱北海濱天下有道同爲臣南山南北山北天
下無道不相識

火樹歌

星漢不輝元夕同九衢香浸春融融誰家剗奇出
新構燃燈剪綵成高叢孰爲春華孰秋卉儼然巧
奪天地工初疑珠光綴木杪久之如水流寒空澄

澄灑灑送良夜若明若滅情無窮靜者觀之榮悴
在又惜難度終宵風世間浮燄不易襲應有造物
權其中

伯陽招集來遠閣同朗倩非兀魯元寓庸

落日當天下遙臨湖上樽山光四壁迥秋色一樓
溪醉後不知處靜中如有言愛君牕外水萬頃照
無痕

過淄水

屢過青齊水流溪獨此灘幸逢春漲淺猶覺客心

寒策騎憑何險塞裳涉更難低徊觀逝者感歎入
無端

瘞猫

賴此驅除力悠然十載過魚羹為爾設鼠輩奈他
何靜夜諸聲集空齋一簞多安眠今不易食黍自
興歌

影園詩為鄭超宗賦十韵

似攬空中色君為半壁扃亭軒開地幻草樹吐江
靈孤念若生趣群光自結形水涵無盡碧天映一

隅青淨案雲堪落虛楞月易停行將銷視聽亦以
證玄冥繪寫誰濃淡文章我醉醒夙因徵事母暇
日懶窮經山揖惟南國源傾同北溟摇摇今古際
眼觀豈能寧

當鑪

持籌不惜艷粧先司馬才情倍可憐竹葉半槽人
滌器柳花滿店客停鞭便娟遊冶年三五美酒新
豐價十千未必阮生能醉卧舉杯無語各嫣然

劉象明有駿曰雪兔題之

一潔修名品亦分馳驅終自遠塵氛六花光照支
公廡匹練神遊伯樂羣銀海策來先破浪玉山行
走只同雲明時帝里多賢士皎皎非從空谷聞

紙帳和徐天子

寤寐床書老蠹胎剡藤留影只疎梅鮫人未卷冰
綃去玉女爭攜雪蘭來蝶夢三更同栩栩霜痕滿
簾自皚皚情酣半榻真毫素不費輕羅百尺裁

三歸臺

東阿尋廢址空見野棠開片石千秋立猶思天下

才

盧溝橋早行

鳴角孤城破曉寒征塵驅夢隔長安渾河流水盧
溝月一段蒼涼立馬看

秋聲

觸響無端莫可尋西風不靜夜沉吟耳邊一片閒
消息歷歷偏驚楚客心

過穆陵關

巍然高阜入雲閒地盡青齊千里間大國餘風誰

可訊一鞭空指穆陵關

朱明恭

明恭字又安羽文姪也性質魯而志嚮學勤於誦讀以困勉之功自程好古書籍負笈虞山與葉石君友年二十餘病卒屬續之頃猶戀戀讀書若有不能舍然者為可悲也石君嘗過其墓而弔之曰一尺荒墳古澗邊流泉急處憶君年已無稚子傳書卷剩有衰親送紙錢山映白楊淒落日溝乾紅葉滿殘煙傷心故友頻回首淚洒西風欲暮天

春日病中感興

春愁縈一榻芳信久難憑帶艸書千疊箋花拂幾層孤身渾似客耽病不如僧漫續逍遙論逍遙恐未能

滌研

波立山光碧一灘指端摸索動文瀾可知石性同雲性今古濛濛未易觀

朱枝昌

枝昌字萬年

七十二峯

東山

卷二十六

戊辰夏五月余之廣陵超宗適有吳門之役
相去不兩日有此去留之奇走筆相贈以當

離歌

金閨幾發懷君夢虎邱精舍期君共望君不見來
見君見君君恰離帆動遲留宛若待余別速來一
似爲君送姑蘇城外荷花蕩平山寺前楊柳堤吳
儂折柳翻能贈仙棹看花孰爲攜所當爲主皆爲
客踪跡浮雲不可必相思夜夢響秋濤直把邗江
易震澤太史倘占德星聚兩地計程剛五百雖非

聚首總同心何異晤言於一室社剏龍門眼要青
壇登牛耳眉推白飛絲奏肉糲瑜嬌一點風流響
誰擲新詩若投新相知豈可故人無一辭遊草郵
將仍躡雪慎勿匆匆梨棗之

梅夜

祇緣如雪皎向夜未漫漫光漸隨香暗春因逼艷
寒客歸花氣送烏宿月痕攢竹響松聲和羅浮夢
不安

瓶梅

清供殊相稱名磁浸古香雖然臨綺席猶自凜冰
霜生意頻添水幽情勝擷芳虬龍如欲動燈影照
昏黃

閱耕

麥浪登場盡秧針刺水香拔煙青滿把栽雨碧成
行東作躬耕課黎民務本方年來知稼穡疇昔媿
膏粱

同超宗贊可士預訪鄭賓興吳君聞於郊南
茅屋即見君聞二子

門鑿溪爲隔橋通聽客登座分半雁序閣轉幾螺
層米熟霜前汁鮮烹屋後曾河東雛盡好問字遠
擔簦

朱鳳起

鳳起字振玄縣諸生

池上避暑

看髮亂如藻臨池生綠光幽中天近古陰處水私
涼刻竹憐侵骨沉瓜喜沁瓢小眠新得慣消盡幾
分長

月秋

湖東涼月滲孤岑一片清光無數砧白到霜階看
止水簾鈎徹夜釣花陰

朱汝龍

汝龍字雲從

秋日閒居東隱公

溪橋南向岸東頭盡日盤渦到白鷗黃葉聲中花
逕宵青山影裡竹扉幽人情似水偏宜淡生計如
雲好耐秋一自野僧相識後每因風月上扁舟

朱輔世

輔世字德輿

題畫

籬落茅檐傍水涯滿林霜葉燦于花清江一派涵
空碧隔岸層巒逗晚霞

朱永譽

永譽字客卿少遊江北爲天長縣諸生攻醫藥善
風水又喜抱一守真之功生平和易善俗寵辱不
驚乙酉當入貢罷策而返避亂歸山而洞庭有黃

蜚卞勝之擾擁兵湖中托名匡復實欲肆掠客卿
爲之開陳利害得以解去葉石君稱其處平世而
不趨競處亂世而克保全有大勝於人者年七十
八歲元旦卒自知時日益導養有素而心神常湛
之驗也

芟菊

野人無市心種菊有餘課自春徂夏秋栽培無不
作有葉患蟲生有蕊欲花大花以黃爲君蕊以素
爲佐因繁簡可喜用損益可賀疎雨綠珠含零露

香液吐了此山林業一杯即高卧

初霽登山寺

雨薄山微洗雲開日破昏仙踪尋古石梵響落孤
村數畝松連刹雙橋水遶門買山原素志于此更
難諼

朱必振

必振字仲玉恂恂儒雅出言有章築桃花磻別業
高亭曲沼古木疎篁具有塵外致與詩人家不官
嚴開一陸仲飛輩結社吟詠擬古之外別創新題

務期各濬心源同歸大雅如雁字菊影睡燕蘧谷
木魚聲明如夢回漢宮等作爭奇競秀膾炙人口
伊弟必掄字珩璧性豪華喜聲色其居傍湖迎笠
澤之洪濤面西山之縹緲有樓矗然在蒼翠間曰
縹緲樓嘗妙選名姝歌舞其中花晨月夕亦與諸
名士張樂遊觀出家姬佐酒如西園雅集故事旣
病猶令人掖以登樓四望雲山潛焉出涕酌酒丈
人峯石揖而別之後吳梅村先生過其地爲詩以
弔焉蓋仲玉珩璧之好尚雖殊而風流自命依然

伯仲未可以詩闕而不爲之傳也

菱湖秋

爲愛五湖勝乘流發棹歌秋淡菱芰老水淺鷺鷗
多片席凌霄漢他鄉遶劍戈不知沉醉後煙月冷
衫羅

友人邀飲桂下

未向月中問先從吳苑看獨酣神領略誰和句清
寒色艷三秋菊香欺九畹蘭醉歸潦倒後猶夢在
花壇

家園歌女演劇諸公贈詩屏障答和

誰將彩筆綴風流珠翠香兼翰墨浮金縷歌隨雲
暗度霓裳舞罷月爲留春陽句艷屏間咏秋水波
分畫裡眸已識雪兒能協律新詞累累亦堪謳

夢中同諸子社集作

溪南柳色無今古硯北春風有淺深勝侶相尋忘
病態共臨山水一高吟

感燕

依依衰柳夕陽斜燕子空庭自落花惆悵不知誰

是主傍人爲說故侯家

朱宗蕃

宗蕃字師獻

咏罌蕉次韻

移來淨几綠層層泉石爲盟潔若冰屈曲蟠根應
似蠖淋漓灑墨誤成蠅圖書有意留雲伴雨露無
求倩水增莫道尋常同一種花開千葉又何曾

放雁

碧天無礙去茫茫何幸仍教返故鄉生死一番毛

羽在從今恩怨可相忘

朱世榮

世榮字季長

夜送友人

寒入空郊肅前山野燒明月痕憐細潤人影散孤
清幽抱溪冬緒乘風達暮行君來雖暫屬亦已慰
羈情

朱鶴

鶴字仲聞縣諸生兄鴻字伯翔太學生雍容庠序

出入必雁舒魚貫跬步不移崇禎末伯翔死仲聞
哭之甚哀乙酉後不就試閉戶讀書於以忘世初
因喀血師事李士裁傳其運氣術至老不衰嘗誨
人曰講五行者是真傳講鼎汞者多偽術彼容成
御女非度世長生秘訣世人誤信往往殺身男子
八八女子七七精血已衰不能成仙人固不可不
早學道也年八十餘步履如少年燈下能作蠅頭
小字與人談終夕不倦蓋內養之功深也

蛛網落花

七十二峯

東山

卷二十六

不點蒼苔不入池却因風舉上蛛絲物情可是能
相愛留得春光又片時

朱秉貞

秉貞字彥安仲聞子負才英邁有倚劍崆峒之概
時帶甲滿地毛錐弗尚棄去八股業究心天文占
驗奇門六壬諸學既鼎革遊京師未有知其志者
牢騷不偶人或憐之有山左朱萊儒者見其談吐
落落自異願結爲兄弟由是常主其家其詩每多
山水棲遲之慨燕遊歡笑形之筆墨有遊燕草藏

於家

讀諫獵書

豺虎山林日計多王家猶合大張羅書生誤說端
居好健殺韓盧當奈何

當日

當日垂楊一抹斜而今故壘漲新沙空餘翁仲斜
陽裡相對無言看落花

朱繼夔

繼夔字君虞

花氣

芳林初潤煖風吹日逗微茫
蝶意疑芬馥若因朝露釀
氤氳全與艷春私雲流深際
情忘去夢躡幽踪思不持
良晤須教襟帶襲中庭閒佇
酒香時

朱濟世

濟世字德聞別號嵩邱少負
雋才讀書尚論留心經濟
孝友端方爲時推重吾師
金元台先生其姻戚也
璋幼時負笈從師德聞嘗至館中猶及見之
鬚眉踈朗警欬如鐘每以詩文商確金師最賞其

咏梅句云獨留太素千秋後誰破鴻濛一氣中近
况云窮到難堪詩有效愁銷不盡酒無功和人感
秋云詩成共賞清新句葉落偏關得失心以爲神
清骨挺意穩辭新沉鬱頓挫不減少陵潘稼堂太
史稱其得錢虞山之正派生平歷遊燕秦楚豫浙
粵賢大夫爭聘請恐後四十餘年不遑家食至七
旬外始歸山中優游泉石葆真息影不復談世上
事葉橫山先生聞其名肩輿造訪謝以他出越日
踏雪叩門語穉子曰止欲談詩非有他故願達其

意迺始接見則嵩邱之高尙可知矣壽躋八十有二所著有自鳴集

夢中得句醒足成之

計日春來久餘寒尚未還月移梅影亂風定竹梢閒好鳥栖林穩幽扉跨澗關洛陽塵不染吟興寄湖山

西郊送春次單榛屢韻

酒闌樓上客停歌爲問春光賸幾何未必一時風掠盡都緣三月雨催過荼蘼漸放情還在蛺蝶高

飛恨轉多莫道園林寥落甚隔牕濃蔭掛藤蘿

梅花三十首存六

塵境穠華不忍思孤標只喜在山時蒼虬夢破形將化翠羽巢成冷不移落月留君溪上舫早霜添我鬢邊絲禁園十載飄零盡誰見橫斜太液池羅浮猶自結氤氳清夢依然再晤君水沃倩肌通月性石支瘦骨隱龍文不妨淡泊交千古爲此芳華冷十分高卧從知非謝事亂雲鳴鳥尚紛紛自許冰霜證肺肝年來驛使斷長安惟知庾嶺幽

人喜詎信孤山處士寒斑剝幾層苔繡古微茫一
片月痕殘灞陵遺事應難繼空倚溪橋白石欄
上林歸去謝塵勞十載寒香襲布袍賸有冰紋浮
枕簟更無珠影動江臯時聞三弄傳吳吹自具千
秋逸楚騷月暗溪山猶未睡何人吟嘯玉樓高
今古高踪有定評愛君豈止重其名風流自足推
何遜詞賦誰能出廣平片月到牕空寫照六花臨
圃各忘情溟濛十里長圻路獨許幽人曳杖行
花譜神仙洵不凡珠璣應向石門函芳菲忍使埋

塵土蕭槭何堪點客衫夜雨獨憐空紙帳春煙又
送渡江帆香魂每托王孫草白莽青濃未可芟

感秋次余文修韻

未識凄然塞外砧嫩涼天氣只愁吟詩成共賞清
新句葉落偏關得失心征雁未翔青漢上吳鉤猶
向碧波沉秋江一曲琴彈罷鍾伯年來不易尋

青溪小姑曲

葯花依岸沚歌出水泠泠小姑不解愁時向月中
聽

八月十三夜翫月

風輕月白好吟詩
賭酒拈題莫放遲
入世快心惟望滿
我於盈處更猜疑

春分日偶題

曉來積雨釀輕寒
綠遍郊原水拍灘
縱是惜春春過半
好花難得賞心看

陳劔浦山爽閣餞別張超然即席分韻

涼風細雨到樓頭
客爲經秋亦倦遊
珍重化工猶惜別
芙蓉兩岸夾歸舟

朱謙

謙字以立縣諸生

即事口占

信口高吟逞老狂
北牕且喜入新涼
問兒檢取瓜爲枕
穩睡一生得幾場

雲蓋青山見黑巔
風前高卧聽流泉
振林長嘯終何濟
百數孫登總暮蟬

朱紹

紹字遵王以立長子縣諸生工篆隸

瓶梅

幽意矜時序清芬轉戀人江城月下笛紙帳夢中
春硯水全留態藜光半影身相看情愈重肯任化
為塵

朱之莢

之莢字鶴書嘉定縣諸生

白蓮

鉛華洗盡水中央傾國仙姿號國粧風靜秋池初
見影月明南浦但聞香芙蓉自悔矜朝艷茉莉應

羞媚晚涼露重最憐垂首處恍疑湘女覆瑤觴



七十二峰足徵集卷二十七

武峰吳定璋友篁菟錄

會稽駱士焯炳文編訂

陳睿謨

睿謨字常采號鹿萍馬蹟山人萬歷庚戌進士初授建安縣再遷息縣擢御史按蜀當安奢之變睿謨勵兵訓士蜀疆倚重巨璫魏忠賢建祠徧天下蜀撫尹同舉以諷睿謨睿謨正色曰豈不知建祠可以梯榮然不若留一塊乾淨土還朝廷禍福吾

安之矣卒不建乃密疏曰惡璫勢焰中外建祠惟蜀無有則能靖皇上之封疆者無如蜀皇上將何以處天下之不如蜀者未幾忠賢伏誅詔給敕命示褒嘉有逆璫肆毒砥柱獨高等語再按畿輔以薊門一疏忤執政出為福建糧道歷江臬楚藩禹州兵備時土寇楊四披猖數邑睿謨簡千戶劉定邦授計擒之捐俸修禹州儒學造書室四十餘間課士其中名穎濱書院請蠲河患地一百二十餘頃民困得紓事載豫省志湖南北峒蠻瓠彘蠢動

朝議請復設偏沅鎮更置巡撫詔睿謨往是時賊在藍山者李荆楚等在桂陽臨武界者劉新宇等在天王寺者劉高峰等睿謨甫到賊已再攻湘圍長河睿謨身履行間指授方畧屢戰克捷三賊悉平未幾獻闖逼荆勢急楚撫疏請勅偏沅撫臣移駐荊州護惠藩睿謨方至荆與撫鎮策戰守而惠藩已微服出邸宵征強睿謨保駕至岳州而荆陷矣使不強保駕荆事尚有可圖者惜哉所著有輔世編傳是堂文集奏疏數十卷崇祀鄉賢閩豫楚

蜀俱祀名宦

烏夜啼

綠柳拂長堤枝頭烏復棲可憐八九子夜夜五更啼

延陵季子祠

入廟竦瞻仰屏容復徬徨幸生君子里來此酌椒漿青苔闕鼎迹白日淪空梁高風動遐溯豈云同子臧所以爭戰餘廟貌猶輝煌

題江陰張睢陽廟

突兀睢陽廟乃在江陰城幽光碎金碧肅肅來群英唐家再造力江淮公所平公看古道間白骨紛縱橫安得鬼董狐一一存其名

塞上曲

青海正啣戈嫖姚一騎過旌旂翻壁月畫角冷銀河沙起黃雲合天橫白雁多飛書歸報捷諸將盡鳴珂

入塞曲

生入玉門關揮鞭唱凱還大風鳴羽箭積雪照陰

山七協貔貅靜諸軍帳旆閒歸來麟閣上蕭瑟鬚
毛斑

沛縣道中懷古

停橈極望一追攀霽色晴霞抱漢關芒碭功高飛
將健大風歌起戰場閒天橫泗水餘孤榭馬渡黃
河盡遠山自是六龍留王氣至今猶見五雲還

贈馬將軍

少年投筆未蹉跎銅柱將軍馬伏波共羨交遊三
輔滿爭傳俠氣五陵多旄頭夜冷燕山月畫角秋

高易水歌天子爲開麟閣待莫教愁絕鬢雙皤

歸夫椒山

山清雲白太湖濱十畝桑間托此身看慣兒童忘
笑語每逢耆舊一逡巡官梅落落傷心麗翠竹娟
娟過眼新不自風塵潦倒後那知珍惜故園春

題畫

石壁寒苔照水晴雲封落木似層城樵夫莫漫出
山去前路崎嶇不可行

送友

七十二峯

馬蹟山

卷二十七

一簇征帆帶曉霞郵亭西去盡平沙錦裘猶道無
顏色白雪為君漸作花

陳康謨

康謨字完宇中丞兄弟行也操履端方言出而人
信服時稱太邱遺風于公再振云

遊夾山竹林寺

平生挺逸趣永懷在邱壑茲遊愜賞心俯仰增遼
索萋萋春草繁蕊蕊春花落結架山之巔登頓欣
有托脩雷挹飛泉浮雲冒林薄瑤草盈堦除金庭

喧鳥雀側徑既窈窕諸峯自交錯耳目靜無擾文
翰時間作似此足忘機一悟存玄漠

山居吟

秋風吹透茅茨屋明月復來照窗北偶步相逢采
藥翁閒眠長對啣花鹿水琴清韻少人知野鶴飛
迴憐我獨城市囂囂不可居何如寂寂山中宿

野塘觀荷

殘日和雲落樹了纖纖嫩月如春花芒鞋偶踏溪
邊路紅渠笑容真無數參差翠蓋影交加芡草菱

盤莽迴護水風颯颯透衫襦水中人影一丈長但
覺清香沁毛骨不知是花還是葉別尋歸徑近黃
昏只見遠烟不見村稻根夜氣露先起葉葉珠光
大如米

微雨

伏枕聽難覺開扉望始明穠花沾有色細草著無
聲脈脈山容重霏霏霧意輕閒愁吟欲遍獨自繞
堦行

棲雲庵探桂未開

未得花枝照眼明歸途無限夕陽情莫嫌覽勝成
虛語只當閒遊亦美名天上雲扶鷹隼翅竹間風
遞鶉鴝聲秋原禾黍離離遍不解愁從何處生

陳咨稷

咨稷字子育號邵公睿謨子崇禎壬午舉人初任
建平縣教諭陞國子學正尋陞兵部司務又陞刑
部郎中恤刑畿輔活死囚無算歷任雲南按察司
僉事兵備副使分巡瀾滄等處皆有政聲捐田百
畝入宗祠為族之貧者婚喪費著有慎刑箴梅花

草堂詩二卷崇祀鄉賢

咏懷

網罟滿陂澤江海多遊鱗
罟羅遍叢薄林谷多翔禽
法密有失出中具天地心
請君破罟網勿令魚鳥驚

遠歸

晝短心目繁頽然獨隱几
憂思結中腸暫坐還復起
歸來意蒼茫煩紆不能理
何如農家流努力事疆理
溫飽同朝昏麾肱牧羊豕
行當負耜鋤鹿門

有遺侶

琴魚歌

宣州近湖多數澤無處無魚
賣城邑獨有琴溪一水間
每年產魚只一日此日何日
三月三忽爾溪中萬魚集
天然不及徑寸長秃尾無鱗
更無骨傳聞昔日琴高仙
携琴一鼓羣魚出因此琴魚
遂得名漁郎歲一來其側我
到宣州冬漸殘山人酌我琴
溪灘指點仙人動操處袖中
還出琴魚看不須授向饗人
手細爵真堪佐杯酒回思游
泳在溪時尚

有仙人鼓琴否

湖州天聖寺壁管夫人畫竹歌

中間五竿勢拂雲龍姿天矯顏色新枝節瘦硬密
葉勻眉山與可都後塵右邊數竿臨水濱竒石位
置高嶙峋小者數寸長過人左邊零亂向背泯不
可細數皆有神其餘點綴妙入情青苔細草各向
榮夫人夫人技絕倫至今壁上猶如生

關山月

邊月海西流征人汗漫遊清光聯鳳闕寒影拂吳

鉤角度千山雪風生萬馬秋誰憐閨閣裡目斷大
刀頭

柳林閘

北望天垂遠空林起暮陰飛揚歸客思搖落故人
心白雁時相見黃雲愁至今不知停棹處何事獨
沉吟

憶東園

故鄉望不及迢遞奈愁何樹暝歸鴉少天空落雁
多風塵消濁酒年歲托狂歌知有池塘在春淡長

薜蘿

元宵雪霽

依然節物近三吳
火樹銀花夾道途
公子自能調玉勒
佳人何用問金吾
笛殘綺席梅開落
雪敞珠簾月有無
莫是聖朝多盛事
千門可賜大官醕

天壇

立馬南郊騁望平
帝宮高扁月輪明
松間想像千官肅
樂觀參差萬籟清
夜夜鬼神朝御仗
層層霞綺擁雕甍
吾皇報祀從來重
龍馭時聞出鳳城

卻憶

却憶夫椒舊草堂
經秋風物倍蒼涼
無邊秔稻垂垂發
別院芙蓉冉冉香
三徑迂迴通小港
諸峰出沒照斜陽
當時自擬揚雄宅
回首兵戈路渺茫

八月十五夜金陵望月

停杯遙望月華新
直到更殘未隱輪
露濯芳林珠玉碎
天啣高閣斗牛親
每因節物思前事
為挹清暉想故人
一夜秦淮歌吹好
偏教孤客易傷神

陳玉璣

七十二峯

馬蹟山

卷二十七

玉璫字賡明號椒峯咨稷子順治庚子舉人康熙
丁未進士授中書科中書舍人掌科事因母年老
告終養朝夕侍奉必躬必親居鄉謹飭未嘗以私
干請當道所著有學文堂文集統經解史論等書

古意

南山有松柏蔦蘿附其巔松柏何亭亭蔦蘿自翩
翩上凌千仞峯下俯百尺淵托體雖不同相依亦
已堅願言弗遺棄一一全其天

京口道中

昨夜宿丹陽今日入潤州眇然道路長靡靡我心
愁清暉薄迴谿飛雲翳方舟鸛鶴遠相叫鷗鷺爭
分投人家繞原隰黍稷盈田疇雲端衆山見林表
孤煙浮男兒志四方無為悲遠遊村沽且斟酌可
以銷煩憂

送友

長江日夜流攜手逝安適離別在須臾徘徊岐路
側四顧起悲風陰雲互交結君其慎風波所願崇
明德歸翰會有時矯首冀良覲

軋軋機杼聲月落天未曙飢隼思摩天迴旋復匝
樹况有寒飈侵當我羈愁處

白溝行

白溝春色何芳菲緋桃碧柳牽人衣沙際水禽啣
魚舞天上白雲倒峽飛昔聞宋遼此分界南北旌
旂夜合圍又聞永樂天威臨數十萬人還者稀白
溝從古作戰場白溝經過人斷腸

短歌和王西樵吏部題壁

茅屋破漏雨不止土銼冷落垣半圯西樵先生詩

有神淋漓翰墨長留此我來顧盼興忽發數行傍
爾顏色喜先生有歌子和之眼底和予誰者是

銅雀臺

銅雀臨漳岸君王罷舞衣可憐金雁冷獨有總幃
飛繡瓦迷春草空臺掩夕暉千年河水上陵樹夜
霏微

澄江夜泊有感

極目荒江上蒼茫野興多西風高鐵笛塞月冷銅
駝樹杪孤帆出天邊隻雁過旅愁驚赤羽昨夜過

黃河

登報恩寺塔

勝絕驚吾在天邊見此心大江餘一綫鍾阜失千
尋夜夜斗牛宿時時風雨吟欲將灰劫事稽首問
祇林

再過徐山人居賦別

頽壁曾題徧荒臺憶過頻忽驚鬚髻改彌覺性情
真計拙艱生理交深識苦辛驪歌君莫唱婁絕恐
傷神

黃河二首

不識黃河水今看九派渾大星垂谷口斜日盪天
門風靜波仍壯帆歌沙欲奔乘槎多少客何處問
崑崙

徙倚黃河岸源從天上來風聲生峽谷雨氣過荒
臺樹暝禪燈出城孤畫角哀澄清應可竅真乏濟
川才

梁氏園讌集

八月西風起上游諸公落落共登樓星臨景樹千

七十二峯

馬蹟山

卷二十七

山曉天入黃河萬馬秋寶瑟盡翻宮女怨金笳偏
動旅人愁誰憐嘹唳南飛雁回首江鄉迥白頭

再過滄洲便寄黃雲孫

嚴城樓堞鬱嵯峨千里扁舟此重過一帶潮聲高
渤海萬家春色斷潯沲酒懷真覺天涯好詩興偏
從客裡多爾在江南如見憶狂奴今夜正高歌

荆溪夜泊與戴九韶

每因訪戴即停舟更愛溪山耐滯留兩水波瀾融
岸月諸峰蕭瑟帶江秋微吟漸覺新詩穩對酌渾

忘永夜愁那得買鄰來此地同君蠟屐恣遨遊

嶧縣

雲連鉅野千帆外地入彭城萬嶺間無數飛鴻南
向去可憐聲影到吳關

題捧心圖

嬌歌艷舞未歸吳薄倖空羞范大夫試問蘓臺承
寵日捧心還似舊時無

陳志浚

志浚字公遠康謨曾孫事母至孝撫兄遺孤竭盡

恩勤與季弟有斐同居四十載無間言弟卒撫其
遺孤一如兄孤復以所置田產共之其孝友可以
風世焉

同友人竹圃納涼

牧笛吹烟漾碧空板橋漁唱夜燈紅羅襟暑透芭
蕉月茗椀香浮茉莉風執友才名空冀北諸生文
雅擅江東笑談携手追歡處千箇修篁百尺桐

月夜訪友

竹林低度拂人枝小立籬門欲喚時共閣燒燈知

坐久草堂待月故來遲千章夏木風吹露一片蟲
聲夜絡絲斗室羲皇君自樂手搖紈扇語相思

夏日過神駿寺

瞳瞳佛日寶幢升繚繞香烟瑞霧蒸松老定巢千
歲鶴雲深疑住六朝僧琴棋直喜低無偶詩畫翻
虧學未能古寺清涼惟靜坐耐他炎熱到寒氷

陳璵

璵字良玉號青峰寨前灣人登正德丁卯賢書初
任廣西太平府推官陞雲南大理府通判以直道

忤上官左遷福建市舶司提舉司故轄海商多竒
貨瓊廉潔自持一無所取及致仕歸夫人私蓄珍
珠數顆瓊檢得投之水中曰毋以此玷我清白也

聞丁草窻李行齋訃二首

騎鯨昔詫李太白化鶴又聞丁令威百歲修期信
難保二公相逐竟何歸文章一代推先輩風月三
分付阿誰莫怪年來頻乞請不堪親友久乖違
嗟矣二公辭世緣太湖風景共茫然田廬不掛子
孫念尊酒每于親友傳六十八十任修短前年去

年相後先存亾出處皆了了獨愧天涯尚執鞭

自遣

尚平債畢便行休五嶽何妨日日遊得謝勾緣皆
閭苑不須塵世問瀛洲道成王屋原無我身到天
台別有秋古往今來都是夢歌殘踏踏幾回頭

陳所知

所知字汝至瓊從子究心河洛之學著有性理翼
言六卷

擬古竹津謠

古竹津頭山若屏古竹山前波浪驚開山種竹堪
成隱底事偏尋險處行

隱君泉

脫冠早已掛新昌歸鑿山泉半畝方泉上有廬堪
結隱不教人笑白頭郎

陳履儀

履儀字竇長天性孝友其父玄由禮部儒士授廣
西宣化縣主簿以老病不赴履儀偕其弟履儼孝
養終身食貧砥行日事著述

捕虎有感

莫捕山中虎山靈賴作君狼貪當屏迹狐媚亦空
群縱猛非苛政雖凶不啜人直須由北渡太守有
劉昆

官長峯晴眺

雲收天半玉屏寒日映嵐光翠結團氣豁東湖浮
震澤勢凌南越控諸蠻吟眸絕却披圖覽放意寧
忘着屐看經世自非捫虱士願收凝碧入詩壇

陳履儼

履儼字若思號敬亭與兄履儀孝友相承讀書好古著作甚富于馬蹟山志尤爲集大成云晚年別號具區外史

渡湖至吳門遇便風大舉故園岸樹東隱新秋景物佳雨後暑初斂扁舟越渺茫風利不知險張帆駕洪濤迎送山萬點湖泮如軍聲迅疾邁熖焰舟子拽兩帆破浪不肯貶百里一炊時香山翠如染漸聞雞犬鳴船頭酒旗颭浩蕩適我懷貪看意猶歉

秋漲不退書感

君子切民隱不在位卑高仲尼席不暖大禹脛無毛今古同斯轍食祿分其勞豈曰丁我躬甘讓夔與學歲昔在午未水旱慘頻遭死徒已過半哀鴻聲嗷嗷詎當今夏末陽侯復怒號淫雨二十日山脚吼奔濤憑高一遠望巨浸駭吾曹老弱飽魚鱉棺槨委蓬蒿屋角水出面樹杪棲巨螯十室喪其九貧富鮮能逃迄今秋已半水勢尚滔滔婦子忍羞恥相率丐糠糲粗澁難下咽往往斃城壕見者

每酸鼻淚落滿緼袍催科猶四出胥役怒且豪為
問何太急滇楚戰相鏖羽檄下郡邑征餉復征漕
稼穡既已廢官吏仍驛騷皮骨亦僅存寧復有脂
膏民牧不我貸我命如弁髦飢寒盜之源追呼將
教獠予如漆室女憂心常怵怵敢告我執事且勿
飲醇醪災雖天所降亦由人事撓民死無罪歲燮
理等鈞陶蒼生力已竭慎哉諸執羔

弋虎

夫椒之山家比屋可以羣遊可以獨暇日行吟恣

所如石徑松陰時放足胡為忽有寅將軍來嘯高
崖震林木腥風簸蕩白日昏童叟驚聞有似鵠弱
肉之食盡犬羊豈僅耽耽麋與鹿雨餘雪後睹行
踪巨細縱橫滿山麓謂為母子或其然跣梁三載
家無畜陽羨有獵技最高劇金往聘何辭勞獵徒
四輩來吾里藐彼虓虎同稚羔獵厥兩魁并四子
三日之間矢已橐昔謂二凶今乃六幸茲一舉誅
其族群然獻與邑大夫虎不渡河今被戮四民作
息已無虞任我徜徉秦履隩虎兮害雖除猶

恐泰山聞婦哭

秋日遊金沙灣砬

俗云仙人几

盤龍嶺後金沙灣沙平如掌山迴環鳧雁下時書
 个个白蘋紅蓼秋斑斕轉北砬砬更奇險石梁歌
 仄橫空仄雨後飛泉瀉入湖吞卻雲根千萬點過
 橋仙洞復兩重嵌空豁訝藏蛟龍側身而入一跌
 坐對面削出青芙蓉石几亭亭在山足渾疑仙叟
 留棋局攀蘿抱石乃得登楚人姓氏何年斲

石面鐫有

楚人王茂方五字

湖波鞦韆打晨昏石上千秋舊水痕

瑟蘆花明月夜照將秋色入漁村

題留雲閣二絕

山中小閣嶺頭雲時共香烟裊作紋若是白雲留
 得住我邀風月與平分
 禪窓無事每忘開留得閒雲護佛臺何似推窓放
 雲去任他自在去還來

又作轉語二絕

棲雲庵內留雲閣老衲千雲住閣東雲裡藏雲真
 是勾不知僧在幾重中

山中諸物皆身外閣外閒雲住此身我不留雲雲
自任卷舒出入總宜人千雲封閣東雲不飛雲直

陳璠

璠字古淡張青灣人

同錢墨岩遊桃花灣

松筠夾徑午風清隔塢幽禽三兩聲雪浪翻湖觀
世態野雲橫嶺逗詩情泉流曲澗琴音細鷗落明
沙玉片輕信是利途人自醉漁樵原不問功名

陳世祉

世祉字亮衷別字介夫為無錫縣諸生食飭有年
潛心理學肆力於古文辭江右魏叔子先生雅重
之序其借行軒詩草後由張青遷居江陰之桐圻

小胥山弔伍相國

笠澤浩浩自太古無數青峰莽回聚波濤噴薄忠
義魂日月照耀蛟龍怒西青石壁何斑斑我來獨
弔小胥山吹簫載橐真騷屑破郢鞭屍疑等閒姑
蘓臺上方耽樂讒口鴟夷渺相索由來快志必傷
心天道神明此焉度前山蘆荻月紛紛丹楓翠葉

生愁雲千古誰如大夫烈以生殉父死殉君烟波
若遇范蠡檝吳越興亡嘆何及只今漁父息悠悠
我欲枯崖荷篋笠

春日自桐圻歸夫椒舟中二首

中夜懷明發輕裝泛碧流疎星催曉日殘月冷孤
舟柳色供詩料濤聲作枕頭片帆湖口泊浩蕩豁
雙眸

五湖春漲急一路水潺湲魚拜重濤去鴉衝細雨
還扁舟天上坐千嶂插雲間隔岸聞人語知迎古

竹灣



